

enrôlés de force

DIDELENG

Dringenden Appel un all Enrôlé de Force

Komerôdinnen a Komerôden,

No bâl 30 Jêr lângem vergiewlechem Asätz an alle Verhandlungen matt dénen verschiddenen Regierungen, wösst Dir, dass eis Arbecht, an eis Bem'ongen Gerechtegkét fir d'enrôlés de force ze kré'en, bis zum heitegen Dâg o'ni den endgëltegen Erfolleg bliwen sinn. Trotz villen Versprieche fun dénen énzelen Parteien go'f den tippeschen Problém fun den Enrôlés de Force net geleisst; an dât mat voller Absicht. Mir kennen, a wellen dât net mei weider nokuken! D'Fédératio'n an de Comité Central, nom Beschluss vun der Assemblée Extraordinaire fun den Gélégé'erten zu Walfer hun doerobber hin beschloss Mir égen Löschten fir d'Chamberwahlen den 10. Juni 1979 opzustellen. Mir müssen é fir allemôl, dénen énzelen Parteien weisen, dass d'Zwangsrekruté'ert nach net all um Kirfecht leien, an dass dé', dé' nach do sinn, énnert kengen Emstänn gewellt sinn ze kapitulé'eren.

Och des Aktio'n, ewé' so' munneg âner (z.B. d'Pétitio'nsaktio'n mat 40.393 Ennerschrôften -Heinemann-Protest, mat mé' wé' 5000 Leit a Kélt an a Schnéi - etc) muss en Erfolleg ginn! Fir dass desen Erfolleg gesechert ass, mâchen mir en drengenden Appel un all Enrôlé, seng Familie an seng Bekannten, fir des Aktio'n mat allen Metellen ze ennerstôtzen. Wann nämlech keng genügend gro'ss Zuel fun Stömmen op d'Löschten fun den Enrôlés de Force kommen, dann gett nie mé' d'Dommage de Guerre+Gesetz geännert. D'Stonn vun der Wo'erecht ass do! Des Ké'er oder nie mei! All énzelen Enrôlé, muss sech also bewosst sinn, dass et op seng Hëllef an seng Ennerstötzung ukennt. D'ass net fir des oder dé' Ausried ze fannen fir sech lânscht seng Verantwortung ze drékken. All énzelen muss sech am klôren sinn, dass dât esoe net mé' kann firun goen. Mir kennen einfach dé' Responsabilité't net mei iwerhuelen, fir d'Komerôdinnen an d'Komerôden fum Comité Central, an och dé' Komerôden dé' mam Comité Central zesommen schaffen, weiderhin nach ze hetzen an ze joen, fun enger Verhandlung a Versammlung an dé' âner. Dir sitt iech wahrscheinlich net bewosst doeriwer, dass och des Komerôden, mitt sinn; gesondhétlech an nerflech no beim Enn sinn. Et gét also net mé' duer fir hannert dem Kolonnenuewen mat den Hänn am Scho'ss ze setzen, an ze wârden, bis d'gebrôden Bauwen eis an de Mond geflunn kommen. Och d'Familien fun dénen Komerôden, dé' all Dâg op der Achs sinn, hätten lé'wer, wann hiren Mann an hiren Papp och émol én Owend kennt dohém bei der Famill sinn, anstatt all Dâg, fir eis Sâch bis an d'Nuecht eran beschäftegt ze sinn. Fun dénen finanziellen Dépensen, dé' all des Komerôden hunn, guer net ze schwätzen.

An dofir, lé'f Komerôdinnen a Komerôden, mengen mir, dass et hé'ch Zeit wir, dass all énzelen Enrôlé sech d'Frô stellt: "Wât hunn ech bis elo schon beigedroen fir eis Cause, an wât kann ech nach mathôl'efen fir eis Fuerderongen zu engem gudden Enn ze fé'eren?" So' wé' mir eis énnert der Fuchtel vum Preis, an echter Komerôdschaft gegenseitig gesteipt an gehollef hunn, zesommen mat all dénen gudden Letzeburger dé' Happ a Gud, Gesondhét a Liewen op d'Spiel gesât hunn fir ons ze hëllef, esoe müssen mir bei den kommenden Wah-

len én émolegt Beispiel vun Solidarité't virdémonstré'eren. All ons Stömmen ginn des Ké'er op d'Löschten vun den Enrôlés de Force!
- Löscht N° 9 -

Och wanns du jöerzingtelâng CSV, DP oder LSAP gestömmt hues, da mâch et desen 10. Juni net. Dofir ginn des gro'ss Parteien net ënner! Awer sie müssen agesinn dass hier Wieler net de Géck mat sech mâche lossen an net ~~accepté~~ accepté'eren dass en nationalen Problém wé' dé', geschafen durch eng ongerecht Behandlung fun den Zwangsrekruté'erten am Kriegsschädengesetz, net kann verschléft ginn bis dé leschten begru'wen ass. Bis elo huet jo dé' Partei fir dé's du gestömmt huest, déin Problém net gelé'sst! Kann des Partei dir en Virwurf mâchen, wanns du hir dein Vertrauen net mé' schenkst? Sie haten Zeit genug. Elo ass et Schluss! Deng Stömm, denger Frâ oder dengem Mann hir, dengen Kanner an denger ganzer Famill, onsen Frönn a Sympathisanten, all des Stömmen ginn den 10. Juni op d'Löschten vun den Enrôlés de Force. - Löscht N° 9 -

Vive e freit a gerecht Letzeburg

Fir de Comité

René Kerg

Heimadden invité'eren mir iech an ons

A S S E M B L E E G E N E R A L E 1979

an de "Foyer pour vieux et jeunes" (Hild op der Gare)

e Samschdeg den 12. Mé 1979,

um 20 Auer

Ordre du jour:

Begréssong durch de Präsident Jos Weirich

Tätégkëtsbericht vum Secrétaire Luc. Schaeffer

Caissebericht vum Trésorier Jeng Fox

Rapport vun de Caisse-Rewisoren

Referate iwert d'allgemeng Situatio'n an d'Wahlen

Frei Aussproch.

Op d'Wichtégkét vun deser Versammlung brauch wuel net higewiesen zé ginn nodém wât hei virdrun erwähnt ass ginn.

Mir zielen op jidderén
fir de Comité

Luc Schaeffer
Secrétaire